

Na osnovu člana 26. i 28. stav (2) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i tačke XII stav (5) Odluke o uslovima i načinu korištenja sredstava ostvarenih na osnovu posebne naknade za zaštitu od prirodnih i drugih nesreća ("Službene novine Federacije BiH", broj 4/12, 80/13 i 20/20) na prijedlog Kantonalne uprave civilne zaštite Kantona Sarajevo, Vlada Kantona Sarajevo, na 79. sjednici održanoj 19.05.2022. godine, donijela je

ODLUKU**O UTVRĐIVANJU KRITERIJA ZA DODJELU POMOĆI
OPĆINAMA IZ SREDSTAVA OSTVARENIH PO
OSNOVU POSEBNE NAKNADE ZA ZAŠTITU OD
PRIRODNIH I DRUGIH NESREĆA****POGLAVLJE I. OSNOVNE ODREDBE****Član 1.**
(Predmet)

Ovom odlukom utvrđuju se kriteriji, postupak i način dodjele finansijske pomoći općinama s područja Kantona Sarajevo (u daljnjem tekstu: Kanton) iz sredstava ostvarenih po osnovu posebne naknade za zaštitu od prirodnih i drugih nesreća (u daljnjem tekstu: sredstva posebne naknade), koja pripadaju Kantonu, za namjene iz člana 183. stav (1) tačka 8) Zakona o zaštiti i spašavanju ljudi i materijalnih dobara od prirodnih i drugih nesreća ("Službene novine Federacije BiH", br. 39/03, 22/06 i 43/10) (- u daljnjem tekstu: Zakon o zaštiti i spašavanju).

Član 2.

(Planiranje sredstava za pružanja pomoći općinama)

Na osnovu zahtjeva općina, a u skladu sa raspoloživim sredstvima posebne naknade u Budžetu Kantona - Kantonalne uprave civilne zaštite Kantona Sarajevo (u daljnjem tekstu: Uprava), planira se dio sredstava posebne naknade za pružanje finansijske podrške općinama u ostvarivanju njihovih zadataka zaštite i spašavanja u godišnjem planu korištenja sredstava posebne naknade, kojeg u skladu sa tačkom XIII stav (3) podtačka 2) Odluke o uslovima i načinu korištenja sredstava ostvarenih na osnovu posebne naknade za zaštitu od prirodnih i drugih nesreća ("Službene novine Federacije BiH", br. 4/12, 80/13 i 20/20) (- u daljnjem tekstu: Odluka o korištenju sredstava posebne naknade) donosi Uprava uz pribavljeno mišljenje Štaba civilne zaštite Kantona Sarajevo (u daljnjem tekstu: Štab).

POGLAVLJE II. NAMJENA I IZNOS SREDSTAVA**Član 3.**

(Namjena sredstava koja se dodjeljuju)

Iz sredstava posebne naknade koja pripadaju Kantonu, može se, prema potrebi pružati finansijska podrška općinama u ostvarivanju njihovih zadataka zaštite i spašavanja isključivo za namjene utvrđene u članu 183. stav (1) tačka 8) Zakona o zaštiti i spašavanju, i to:

- a) za opremanje općinskih štabova civilne zaštite, službi zaštite i spašavanja, jedinica civilne zaštite, povjerenika civilne zaštite i operativnih centara civilne zaštite (u daljnjem tekstu: općinske strukture civilne zaštite);
- b) za obuku općinskih struktura civilne zaštite;
- c) za udruživanje sredstava posebne naknade sa općinama, drugim kantonima i Federacijom Bosne i Hercegovine (u daljnjem tekstu: Federacija BiH) u zajedničkim projektima razvoja sistema zaštite i spašavanja;
- d) za pomoć u plaćanju mjesečne naknade za rad povjerenika civilne zaštite iz čl. 52. i 53. Pravilnika o načinu rada i funkcioniranja štabova i povjerenika civilne zaštite ("Službene novine Federacije BiH", br. 77/06, 5/07 i 32/14), a što je propisano članom 60. stav (5) navedenog Pravilnika.

Član 4.

(Iznos sredstava koja se dodjeljuju)

Godišnjim planom korištenja sredstava posebne naknade, utvrđuje se iznos sredstava koja se dodjeljuju za namjene iz člana 3. ove odluke, i to:

- a) za opremanje općinskih struktura civilne zaštite, može se koristiti do 50% sredstava od procenta koji je propisan tačkom VIII stav (2) Odluke o korištenju sredstava posebne naknade;
- b) za obuku općinskih struktura civilne zaštite, može se koristiti do 50% sredstava od procenta koji je propisan tačkom IX stav (1) Odluke o korištenju sredstava posebne naknade;
- c) za udruživanje sredstava posebne naknade sa općinama, drugim kantonima i Federacijom BiH u zajedničkim projektima razvoja sistema zaštite i spašavanja, koristit će se slobodna sredstva iz prethodnih godina, kumuliranih na području (sredstva za koje nije određena namjena ili donesena odluka o utrošku), čiji iznos se utvrđuje na osnovu procjene potreba Kantona za zajedničkim projektom, uzimajući u obzir značaj tog projekta za daljnji razvoj sistema zaštite i spašavanja ljudi i materijalnih dobara od prirodnih i drugih nesreća na području Kantona;
- d) za pomoć u plaćanju mjesečne naknade za rad povjerenika civilne zaštite, koristit će se sredstava iz tač. VIII stav (2) i IX stav (1) Odluke o korištenju sredstava posebne naknade, čiji iznos se određuje na osnovu podataka o broju postavljenih povjerenika civilne zaštite u općini, visini naknade za rad povjerenika civilne zaštite utvrđene rješenjem službe civilne zaštite općine, te podataka o prilivu sredstava posebne naknade u prethodnoj godini općine koja traži pomoć.

**POGLAVLJE III. KRITERIJI, POSTUPAK I NAČIN
DODJELE POMOĆI****Član 5.**

(Kriteriji za dodjelu pomoći općinama)

Pri dodjeli pomoći općinama iz člana 3. tač. a), b) i d) ove odluke, primjenjivat će se kumulativno slijedeći kriteriji:

- a) da je formirana služba civilne zaštite općine, gdje se kao dokaz o istom prilaže izvod iz pravilnika o unutrašnjoj organizaciji općine, odluka o formiranju službe ili drugi dokaz koji nedvosmisleno ukazuje na to;
- b) da je formiran štab civilne zaštite općine, gdje se kao dokaz o istom prilaže odluka o formiranju ili rješenje o imenovanju štaba;
- c) da je donesena procjena ugroženosti općine, gdje se kao dokaz o istom prilaže odluka ili zaključak o usvajanju procjene;
- d) da je donesen plan zaštite i spašavanja od prirodnih i drugih nesreća općine, gdje se kao dokaz o istom prilaže odluka ili zaključak o usvajanju plana;
- e) da je donesen program razvoja zaštite i spašavanja od prirodnih i drugih nesreća općine, gdje se kao dokaz o istom prilaže odluka ili zaključak o usvajanju programa;
- f) da općina ima organizovane strukture civilne zaštite, gdje se kao dokaz o istom prilaže odluka ili drugi akt o organizovanju, te rješenje o postavljenju

- povjerenika civilne zaštite i rješenje o utvrđivanju naknade za rad povjerenika civilne zaštite;
- g) da je zahtjev općine za dodjelu pomoći detaljno obrazložen i dokumentovan, gdje se kao dokazi o istom prilaže izvod iz programa razvoja općine iz kojeg se vidi da je projekat, aktivnost ili mjera planirana, predračun ili dokument iz kojeg se nedvosmisleno vidi cijena koštanja projekta, aktivnosti ili mjere, dokument iz kojeg se vidi da je realizacija projekta, aktivnosti ili mjere planirana u toku godine ili naredne godine i drugi dokazi;
 - h) da se sredstva posebne naknade vode na posebnom namjenskom transakcijskom računu, gdje se kao dokaz o istom prilaže odgovarajući dokument iz kojeg se nedvosmisleno vidi da je račun otvoren;
 - i) da se dostave podaci o prilivu sredstava posebne naknade općine u prethodnoj godini, gdje se kao dokaz o istom prilaže izvod sa transakcijskog računa ili drugi finansijski dokument iz kojeg je moguće utvrditi tačan iznos priliva sredstava posebne naknade općine u prethodnoj godini.

Član 6.

(Zahtjev općine za dodjelu pomoći)

- (1) Zahtjev za dodjelu pomoći iz člana 3. tač. a), b) i d) ove odluke podnosi Upravi općinski načelnik, na početku kalendarske godine, a u izuzetnim i opravdanim situacijama, zahtjev se može podnijeti i u toku godine, s tim da se njegova eventualna realizacija pomjera za razuman rok.
- (2) Zahtjev iz stava (1) ovog člana mora sadržavati slijedeće podatke:
 - a) naziv i adresu općine koja pomoć traži;
 - b) u koju svrhu se traži finansijska pomoć;
 - c) iznos finansijske pomoći koja se traži;
 - d) konkretne zadatke, odnosno namjene za čije finansiranje se pomoć traži.
- (3) Uz zahtjev iz stava (1) ovog člana prilažu se odgovarajući dokazi (dokumentacija) iz člana 5. ove odluke.

Član 7.

(Postupak i način rješavanja zahtjeva općine za dodjelu pomoći)

- (1) Uprava je dužna zahtjev iz člana 6. stav (1) ove odluke, uzeti u razmatranje, u roku od sedam dana od dana njegovog prijema.
- (2) Ukoliko zahtjev iz stava (1) ovog člana ne sadrži sve podatke i odgovarajuće dokaze (dokumentaciju) iz člana 6. st. (2) i (3) ove odluke, Uprava će u pisanoj formi zatražiti od podnosioca zahtjeva za dodjelu pomoći da isti dopuni sa odgovarajućim podacima i dokazima (dokumentacijom) u roku od 15 dana, a ako to ne učini podneseni zahtjev smatrat će se neurednim i neće se uzeti u daljnje razmatranje.
- (3) Ukoliko zahtjev iz stava (1) ovog člana sadrži sve podatke i odgovarajuće dokaze (dokumentaciju) iz člana 6. st. (2) i (3) ove odluke, Uprava će na osnovu iskazanih potreba općine, uzimajući u obzir značaj projekta, aktivnosti ili mjere za općinu u ostvarivanju zadataka zaštite i spašavanja, stepen ekonomske razvijenosti općine, mogućnost općine da iz svojih sredstava, koja se osiguravaju u skladu sa čl. 179. i 180. Zakona o zaštiti i spašavanju, izvrši finansiranje potreba ili dijela potreba za koje se traži pomoć, priliv sredstava posebne naknade

općine u prethodnoj godini i druge faktore od značaja za zaštitu i spašavanje ljudi i materijalnih dobara od prirodnih i drugih nesreća, a u skladu sa raspoloživim sredstvima posebne naknade u Budžetu Kantona - Uprave, predložiti Štabu donošenje odluke o dodjeli pomoći.

Član 8.

(Organi ovlašteni za odlučivanje o dodjeli pomoći)

O dodjeli pomoći općinama iz člana 3. tač. a), b) i d) ove odluke, na prijedlog Uprave odlučuje Štab, na način da za svaki pojedinačni utrošak sredstava iz člana 4. tač. a), b) i d) ove odluke, donosi odluku na osnovu godišnjeg plana korištenja sredstava posebne naknade iz člana 2. ove odluke.

Član 9.

(Način dodjele pomoći)

- (1) Na osnovu odluke Štaba iz člana 8. ove odluke, Uprava potpisuje ugovor sa općinom o dodjeli sredstava iz člana 4. tač. a), b) i d) ove odluke.
- (2) Sredstva iz člana 4. tač. a), b) i d) ove odluke uplaćuju se direktno na poseban namjenski transakcijski račun, odnosno podračun budžeta općine - sredstva za zaštitu i spašavanje.

Član 10.

(Zajednički projekti razvoja sistema zaštite i spašavanja)

- (1) Udruživanje sredstava posebne naknade sa općinama, drugim kantonima i Federacijom BiH u zajedničkim projektima razvoja sistema zaštite i spašavanja iz člana 3. tačka c) ove odluke, može se vršiti samo pod slijedećim uslovima:
 - a) da je projekat od značaja za Kanton i da isti doprinosi daljnjem razvoju sistema zaštite i spašavanja ljudi i materijalnih dobara od prirodnih i drugih nesreća na području Kantona;
 - b) da je zahtjev podnosioca zahtjeva za dodjelu pomoći za zajednički projekat razvoja sistema zaštite i spašavanja detaljno obrazložen i dokumentovan, gdje se kao dokaz o istom prilaže izvod iz njegovog programa razvoja iz kojeg se vidi da je zajednički projekat planiran, kao i sporazum sa drugim općinama, drugim kantom ili Federacijom BiH ili drugi dokument koji potvrđuje da se radi o zajedničkom projektu i da je njegova realizacija planirana u toku godine ili naredne godine, te dokument iz kojeg se nedvosmisleno vidi cijena koštanja zajedničkog projekta i izvod sa transakcijskog računa ili drugi finansijski dokument iz kojeg je moguće utvrditi tačan iznos priliva sredstava posebne naknade podnosioca zahtjeva u prethodnoj godini.
- (2) Ukoliko zahtjev za dodjelu pomoći za udruživanje sredstava posebne naknade u zajedničkim projektima razvoja sistema zaštite i spašavanja ne ispunjava sve uslove iz stava (1) ovog člana, Uprava će u pisanoj formi zatražiti od podnosioca zahtjeva za dodjelu pomoći da isti dopuni sa odgovarajućim podacima i dokazima (dokumentacijom) u roku od 15 dana, a ako to ne učini podneseni zahtjev smatrat će se neurednim i neće se uzeti u daljnje razmatranje.
- (3) Ukoliko zahtjev za dodjelu pomoći za udruživanje sredstava posebne naknade u zajedničkim projektima razvoja sistema zaštite i spašavanja ispunjava sve uslove iz stava (1) ovog člana, Uprava će u skladu sa raspoloživim sredstvima posebne naknade u Budžetu Kantona - Uprave,

predložiti Štabu donošenje odluke o udruživanju sredstava sa općinom, drugim kantonima i Federacijom BiH za zajednički projekat razvoja sistema zaštite i spašavanja.

POGLAVLJE IV. OBAVEZE OPĆINE KOJOJ SE DODJELJUJE POMOĆ

Član 11.

(Namjensko korištenje dodijeljenih sredstava)

- (1) Sredstva koja su dodijeljena kao pomoć općini mogu se koristiti samo za namjene koje su navedene u odluci o dodjeli te pomoći, odnosno, za namjene koje su definisane ugovorom sa općinom iz člana 9. stav (1) ove odluke.
- (2) Općinski načelnik je odgovoran za namjensko korištenje dodijeljene pomoći iz člana 3. tač. a), b) i d) ove odluke.

Član 12.

(Izvještaj općine o utrošku dodijeljene pomoći)

- (1) Općina kojoj je dodijeljena pomoć iz člana 3. tač. a), b) i d) ove odluke, obavezna je u roku utvrđenom ugovorom iz člana 9. stav (1) ove odluke, dostaviti Upravi detaljan izvještaj o utrošku dodijeljene pomoći.
- (2) Izvještaj iz stava (1) ovog člana mora biti potpisan i ovjeren od strane općinskog načelnika.

Član 13.

(Obaveza općine za povrat sredstava)

- (1) Ukoliko općina ne opravda potrošnju dodijeljene pomoći ili nenamjenski utroši doznačena sredstva ili ne utroši doznačena sredstva (u cijelosti ili djelimično), Uprava će jednostrano raskinuti ugovor iz člana 9. stav (1) ove odluke i od općine zatražiti povrat doznačenih sredstava.
- (2) Općina je obavezna u roku utvrđenom ugovorom iz člana 9. stav (2) ove odluke, izvršiti povrat doznačenih sredstava iz stava (1) ovog člana u Budžet Kantona - Uprave na poseban transakcijski račun, otvoren kao podračun - sredstva za zaštitu i spašavanje.

POGLAVLJE V. PRIJELAZNE I ZAVRŠNE ODREDBE

Član 14.

(Evidencija i izvještaj o dodjeli pomoći)

- (1) Evidenciju o dodjeli pomoći iz člana 3. ove odluke, vodi Uprava.
- (2) Izvještaj o dodjeli pomoći iz člana 3. ove odluke, sastavni je dio godišnjeg izvještaja o prikupljanju, raspodjeli i korištenju sredstava posebne naknade iz tačke XIV Odluke o korištenju sredstava posebne naknade.

Član 15.

(Stupanje na snagu)

Ova odluka stupa na snagu narednog dana od dana objavljivanja u "Službenim novinama Kantona Sarajevo".

Broj 02-04-20333-20/22
19. maja 2022. godine
Sarajevo

Premijer
Edin Forto, s. r.